



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Baucau

11 Juñu 2015

Tribunál Distritál Baucau kondena arguidu kazu violásaun seksuál, ofensa ba integridade fízika simples no danu simples ho pena tinan 7 iha prizaun

Iha 09 Juñu 2015, Tribunál Distritál Baucau prezide leitura akordaun no kondena arguidu MdCR ho pena prizaun tinan 7 tanba provadu komete krime violasaun seksuál, ofensa ba integridade fízika simples no danu simples hasoru nia eis namorada. Kazu ne'e akontese iha 17 Abril 2013, iha Distritu Baucau.

Tribunál konklui prosesu ne'e no kondena arguidu ba krime violasaun seksuál pena prizaun tinan 7, ba krime ofensa ba integridade fízika simples pena prizaun fulan 3 no ba krime danu simples pena prizaun fulan 3. Ba krime krime tolu ne'e tribunal akomula hamutuk no aplika pena únika ba arguidu tinan 7 iha prizaun.

“JSMP hanoin katak tuir lolos ministériu públiku tenke husu pena masimu atu kondena arguidu iha kazu ne'e tanba arguidu nia asaun planeadu, grave teb-tebes no involve aktu krime oioin kontra lezada,” dehan Diretór Ezekutivu JSMP, Luis de Oliveira Sampaio.

Tribunál no ministériu públiku tenki sensitivu no konsidera mós faktus seluk nu'udar krime ketak hanesan, sunu lezada ho sigura, ameasa ho tudik, sulan lezada iha arguidu nia kuartu laran no komete violánsia seksuál hasoru lezada.

JSMP fiar katak sentensa ne'ebé justu, sei hanorin sosiedade atu hadok aan hosi krime kontra feto ne'ebé kontinua buras iha ita nia nasaun.

Tribunal prova katak besik Igreja Katedral Baucau, arguidu kaer lezada nia liman, hadau lezada nia telefone no tuda telefone ba parede to'o rahun. Arguidu mós basa dala ida iha lezada nia hasan no kaer metin lezada nia liman no ho obrigatóriu rasta lezada to'o arguidu nia uma no lori tama liu ba nia kuartu laran. Iha kuartu laran, arguidu basa tan dala ida iha lezada nia hasan no sunu lezada nia liman ho sigaru no ameasa lezada ho tudik.

Wainhira lezada husu no hakilar tanba-sa arguidu halo hanesan ne'e, maibé kontinua save odamatan. Depois save odamatan, arguidu dudu lezada ba iha kama leten hasai lezada nia roupa, lezada hakilar maibé arguidu kontinua komete violasaun seksuál hasoru lezada. Mesmu nune'e tribunál mós konsidera katak arguidu la konsege to'o remata tanba lezada reziste no tebe hasoru arguidu. Depois lezada hatais fali nia roupa tuur sadere an ba iha parede to'o dadersan no depois ba apresenta denuncia iha polísia.

Antes ne'e, ministériu públiku akuza arguidu kontra artigu 172 Kódigu Penál kona-ba violasaun seksuál, artigu 145 Kódigu Penál kona-ba ofensa ba integridade fízika simples no artigu 258 Kódigu Penál kona-ba danu simples.

Iha alegasaun finál, ministériu públiku husu ba tribunál atu aplika ne'ebé adekuadu. Entretantu defeza husu atu absolve arguidu maibé karik tribunál iha hanoin seluk aplika pena ne'ebé justu.

Atu hetan informasaun kompletu favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone:3323883 | 77295795